

6.7.1560

1560.

Arrest par lequel
est fait deffenses de
plus prendre aucuns
droits de pe'age es lieux
de Cymons et Yaulmou
et La Fertéchaux
1560

ARCHIVES
DE LA
VILLE DE
NIEVE

ARREST LEQUEL EST
faict deffenses de plus prendre, cueillir, ne leuer aucuns
droicts de peage, & fallage, ou autre subside, és lieux &
destroicts de Lymons & Maulmont, & la Fertéchaude-
ron, sur les marchandises & denrees passans & repassans
par lesdicts destroicts.

Extraict des Registres de la Cour de Parlement.

RANCOIS, par la grace de Dieu, Roy
de France, A tous ceulx qui ces presentes
lettres verront salut. Sauoir faisons, Que
comme en nostre Cour de Parlement,
nostre Procureur general, & les Marchans frequan-
tans la riuere de Loyre, & autres fleuves descen-
dans en icelle, eussent fait dire & proposer, contre,
en l'absence & defaut de noz amez Gaspard de
Saulx, Cheualier, seigneur de Tauanes. Iehan Com-
te de la Chambre, Loys de le Fayette, dame Anne
de Vienne, Anthoine de Vienne, Cheualier, Clau-
de & Iehan de Bauffremont Escuyers, tous heritiers
de la maison de Listenois, defendeurs & defaillans:
Que en vertu de certain Edit de nostre tres-honoré
seigneur & pere le feu Roy (que Dieu absolue)
donné à Fontaine-bleau, le vingtiesme iour de
Mars, l'an mil cinq cens quarante sept, & de certai-
ne commission de nostredicte Cour, du huieti-
esme Feurier, mil cinq cens cinquante vn, auroyent
lesdicts demandeurs des le huietiesme iour d'Auril
oudict an, mil cinq cens cinquante vn, faict adiour-
ner & donner assignation en nostredicte Cour aus-
dits defendeurs, pour apporter lettres, tiltres, &
enseignemens, par vertu desquelz ils pretendent
quelque droict de peage & fallage sur lesdicts bat-
teaux & chalans chargez de Sel, ou autres marchan-

dites, montans & auallans par ladicte riuere, à l'en-
droict des lieux dessuldicts, dedans, le iour de la
sainct Martin ensuyuant,. Lesquels defendeurs, ou
lieu de satisfaire audict Arrest dedans ledict temps,
à eux pour ce faire prefix, auroient présenté reques-
te à nostredicte Cour, pour auoir delay de satisfaire
audict arrest: Et en enterinant laquelle, delay d'un
mois auroit esté donné ausdicts defendeurs, & pour
toutes prefixions & delays, pour satisfaire audict
premier arrest. Or estant ledit delay à eux pour ce
faire prefix, passé & expiré, lesdits demandeurs au-
roient présenté leur requête en nostredicte Cour,
afin qui leur fust permis faire appeller lesdits defen-
deurs aux ordonnances de nostredicte Cour, &
contre eux obtenir default, à faute de satisfaire aus-
dicts arrestz. Ce qui leur auroit esté permis faire. En
vertu de laquelle permission, auroient lesdits de-
mandeurs obtenu leur default en nosdictes ordon-
nances, du iugement duquel default est question.
A ceste cause lesdits demandeurs tendoyent &
concluoyent à l'encontre desdicts defendeurs &
defaillans, à ce que par arrest d'icelle fust dict, Que
ledict default estoit bien & deuëment obtenu au
moyen & pour le profit d'iceluy: Lesdicts defen-
deurs soyent priuez de tout le droict de peage &
salage qu'ils pretendent, & pourroyent cy apres pre-
tendre esdicts lieux & esdroicts de Lymons, Maul-
mont, & la Ferté chauderon: nonobstant ledict
pretendu tiltre fourny pour le regard dudit Victry
seullement. Et defences leur estre faictes, & à leurs
gens, fermiers & commis, de plus prendre & exiger,
ledict pretended droict, sur les batteaux & chalans
montans & auallans par ladicte riuere & fleuues, à

l'endroiect desdicts lieux de Lymons, Maulmont, & la ferté chauderon : sur telles peines & amendes qu'il plairoit à nostre dicte Cour arbitrer : Et outre que lesdits deffendeurs soyent condamnez à faulte d'auoir satisfaiect ausdits arrestz, & d'auoir baillé coppie desdictes lettres, tiltres & enseignemens, en tous les despens, dommages & interestz desdicts demandeurs ; & à rendre & restituer ce qu'ils en ont prins & perceu desdits marchans, par eux, leurs gens, ou commis, & és despens de l'instance : & mesmes és despens de la presente instance, demande & profit de default, tel que de raison. FINABLE-
M E N T, veu par nostredite Cour le default obtenu en icelle par nostre Procureur general, & les marchans frequentans la riuere de Loyre, & autres fleuues descendans en icelle demandeurs en matiere de inhibitions & defences selon le contenu en certain Edict donné à Fontaine-Bleau, le vingtiesme iour de Mars, mil cinq cens cinquante sept, publié en nostredite Cour le vingtiesme iour de Decembre, l'an mil cinq cens cinquante huit : Et de certaine commission de nostredite Cour du huitiesme iour de Feurier, mil cin cens cinquante vn : Et requerant le profit & adiudication dudit default, contre noz amez Gaspard de Saulx, seigneur de Taunannes, Iehan Comte de la Chambre, Loys de la Fayette, Dame Anne de Vienne, Anthoine de Vienne Cheuallier, Claude & Iehan de Bauffremont Escuiers, tous heritiers de la maison de Lisennois, defendeurs & defaillans : La demande sur le profit dudit default : Les deux arrestz de ladite Cour, des vingt troiesme Mars, & quatriesme iours de May, derniers passez : par lesquels ont esté

dōnez deux delaiz de grace, ausdits defaillans, pour
satisfaire à l'appoinctement du quinzième iour de
Ianuier dernier passé: Et tout ce que lesditz deman-
deurs ont mis & produict deuers nostredite Cour,
& consideré tout ce qui faisoit à considerer en ceste
partie: Par arrest d'icelle nostredite Cour a esté
dict, que ledict default a esté bien & deuément ob-
tenu, & pour le profit d'iceluy. Ladicte Cour a de-
bouté & deboute lesdits defendeurs & defaillans,
de toutes exeptions & defenses declinatoires, dila-
toires, & peremptoires, qu'ils eussent peu propo-
ser à l'encontre de la demande desdits demandeurs.
Et outre, que inhibitions & deffenses leur soyent
faictes, en peine de cent marcs d'argent, de plus
prendre, cueillir, ne leuer aucuns droits de peage
& fallage, acquict ou autre subside, és lieux & des-
troicts de Lymons, Maulmont, & la Ferté-chau-
deron, sur les batteaux & chalans mourans & aual-
lans par ladicte riuere, à l'endroiect desdits lieux de
Lymons, Maulmont, & la Ferté-chauderon, ne
contre les marchans & voituriers, leurs denrees &
marchandises. Et outre à condamné & condamne
lesdits defaillans à rendre ce qu'ils ont prins & per-
ceu tant par eux que leurs gens, officiers & com-
mis, desdits marchans & voituriers: & és despens
dudict default, & de ceste instâce, tels que de raison.
En tesmoin de ce, nous auons faict mettre nostre
seel à ces presentes. Donné à Paris en nostre Parle-
ment le sixiesme iour de Iuillet, l'an de grace mil
cinq cens soixante, Et de nostre regne le premier.
Signé sur le reply, Par arrest de la Cour, CAMVS.
Et sellees sous double queue, de cire iaune en
seel apparant.